

中國方志叢書
· 華中地方 · 第八七九號

據

清·狄學耕等修，黃昌蕃等纂
清同治十一年刊本

影印

江 西 省

都昌縣志

(三)

成文出版社有限公司印行

都昌縣志卷之九

人物志

蓋聞人成位乎中不誠則無物自來志乘皆有
人物篇名其義大矣豈獨科名閎闊可稱立人
之道爲物之望乎哉我都芙蓉毓秀彭蠡澡
靈山川曾萃鬱爲英流故處則德行圭璋
出則功名彝鼎其扶植綱常羽翼經傳者代
各有人若夫耆碩之望兄重山林貞烈之操
半存閨閭皆足坊表人倫非第考古者宜
加物色也而名流卜居高賢隱處亦附焉
志人物

理學

宋

黃灝字商伯號西坡唐髮三子唐髮詳仕績傳灝幼敏悟強記入太學登進士教授隆興府知德化縣以興學校崇教化爲本歲饉行賑有方王藺劉穎薦於朝除登聞鼓院光宗卽位遷太常寺簿論當時禮教廢闕請敕有司取政和冠禮葬儀及司馬光高閌等書參訂行之除太

劉稿云舊空白一字省志作府亦誤查黃譜作

大理較確

寺丞出知常州提舉本路常平秀州海鹽民伐桑柘毀

廬屋孳殖盈野而州縣方督促逋欠灝見之蹙然時有旨停擱夏稅灝遂奏乞併擱秋苗不俟報行焉言者罪以專移居筠州已而削兩秩仍從其蠲擱之請灝旣歸里幅巾深衣騎驢廬山間若素隱者起知信州改廣西運判移廣東提刑告

老未赴灝性行端飭以孝友稱朱子守南康灝執弟子禮質
疑問難首言不敢輕爲人師朱子曰以所知語人可也朱子
沒黨禁方厲灝冒禁奔喪徘徊不忍去卒諡文懿著有西坡

集四十卷祀鄉賢祠初祀白鹿洞宗儒祠今配饗紫陽祠

查星

子人物志亦列黃灝於理學而系星子人都昌籍選舉志並
載其名考黃譜灝徙南康在紹熙甲寅距成進士時已久且
鄉賢祠祀仍在都昌未歸星子是星子志當採入寓賢耳至
其子孫若杭若資和若石若虞與異等則又於都昌無涉矣
按舊志理學有彭尋名查尋無大著述可以發明道學之旨
又未經請祀鄉賢及宗儒等祠劉稿故列儒林茲從之

彭蠡字師范號梅坡昶年次子昶年詳孝友傳蠡學問淹貫審

究律呂以聲律領鄉薦授常州府教授累官至吏部尙書

彭譜

云以子方貴
贈吏部尚書

朱子守南康時蠡嘗袖出疑義就質辨析甚精
江淮學者咸師尊之稱梅坡先生晚年立精舍於石潭名盛
多園與同邑黃西坡馮厚齋曹昌谷講明道學性命之蘊甘
叔懷遊廬山朱子致書曰吾友彭師范勝士在隔江都昌可
爲一訪致鄙意不敢以輒爲僞迹相污染也卒贈龍圖閣學
士祀鄉賢祠白鹿洞志初祀宗儒祠今配饗紫陽祠

馮椅字奇之號厚齋性敏博學精於經術朱子守南康時椅執
經就正修弟子禮朱子以友待之在黃彭之間由進士任德
興尉調江西運幹旣而致仕家居授徒講學所著有易經明
解輯說行於世書詩語孟太極圖西銘皆有輯說又有孝經

章句喪禮小學孔門弟子傳續史記及詩文志錄合二百餘
卷卒贈尙書崇祀鄉賢祠白鹿洞志初祀宗儒祠今配享紫
陽祠子四人長去非幼去疾皆另有傳次去辨仕至侍郎去
弱知甯國府

彭方字季正一字季直號彊齋蠡子朱子守南康時方隨父受
業焉弱冠魁省闈登進士授池陽教授遷景陵令特差廣東
經畧安撫司幹辦官改歙縣令諸賢交薦累遷朝議朝散朝
請大夫入直秘閣出知袁州提舉福建常平召還除國子監
司業陞祭酒兼起居注官侍講稱旨除殿中丞遷兵部侍郎
晉吏部尙書屢疏丐歸不許加文華閣及龍圖閣學士提舉

神祐觀以進講論語特旨賜致仕卒贈少師謚文定崇祀鄉賢祠白鹿洞志初祀宗儒祠今配享紫陽祠著有彊齋集在

經筵則有經華續業三十卷

舊志太畧謹采省志及彭氏家譜補傳又經華續業疑有字誤

馮去非椅長子字可遷號深居能讀父書舉進士爲宗學諭時丁大全遷右司諫詔事內嬖竊弄威柄驅逐丞相董槐太學生陳宜中等六人上書言進退大臣當以禮極論大全之奸不宜居清要大至怒取旨削六人籍編管遠州國子監祭酒率齋生冠帶送出園橋大全益怒請禁戒諸生毋得擅議國政詔立石三學

太學京學宗學謂之三學

去非獨不肯署名碑下未幾以

言罷歸舟泊金蕉山有僧上謁致大全意願無遽歸少俟收

召去非奮然正色曰老夫今歸廬山不復仕矣遂絕之不與

言嘗集註洪範經傳崇祀鄉賢祠

舊志稱下注去非仕至該議大夫府省志因之蓋誤

王時潛字元魯號石梁隱居不仕累辟皆辭學問深邃尤精於禮有註釋其言純一不雜同鄉陳澐著禮記集說多采用之今集說中所載石梁王氏云云者是也崇祀鄉賢祠

陳大猷字文獻號東齋師事雙峯饒氏魯究心理學登進士仕至從政郎改黃州軍判官著尙書集傳行世詩經亦有傳註陳澐字可大號雲住一號北山叟大猷子生丁宋季不求聞達博學好古尤潛心於禮著有禮記集說學者宗之稱雲住先生年八十有二卒元虞學士集題其墓曰經歸先生墓初祀

鄉賢祠雍正二年從祀 文廟兩廡稱先儒

元

陳師凱

舊諱

字叔才濬之子究心理學嘗纂述書經蔡傳旁通

行於世後進多宗其學行祖孫三世皆以著述有功聖教

名臣

晉

陶侃字士行早孤貧爲縣吏同郡范逵知侃賢薦於廬江太守
張夔察舉孝廉至洛陽張華見而異之除郎中旣而補武岡
令有能名與太守呂岳有嫌棄官歸爲郡小中正會劉宏爲
荊州刺史辟爲南蠻長史討賊張昌破之以功封東鄉侯永

興二年陳敏據歷陽宏以侃爲江夏太守往討或謂宏曰侃與敏同郡又同歲舉吏脫有異志荊州無東門矣宏曰侃素忠能吾信之已久必無是也侃聞遣子洪詣宏以自固宏引爲參軍資而遣之曰匹夫之交尙不負心況大丈夫乎敏遣其弟恢來寇侃出戰破之隨以母憂去職服闋江州刺史華軼表爲揚武將軍元帝加侃奮威將軍遷龍驤將軍武昌太守流亡來歸者盈路侃竭資賑給焉帝使侃擊杜弢破之王敦表侃爲荊州刺史鎮沌口已而忌侃功左轉廣州以王廙爲荊州侃將鄭攀蘇溫馬儁等不欲南行私謀拒廙侃覺乃夜發進至始興時王機盜據廣州侃遣都護討機走之廣州

平以功封柴桑侯侃在州無事輒朝運百甓於齋外暮運於齋內人問故答曰吾方致力中原過爾優逸恐不堪事大甓二年進平南將軍尋加都督交州軍事及王敦平遷都督荆雍益梁等州軍事征西大將軍移鎮沔口討江夏賊平之楚郢士女莫不相慶侃性聰敏勤於吏職終日斂膝危坐軍府衆事檢攝無遺嘗語人曰大禹聖人乃惜寸陰維我衆人當惜分陰豈可逸遊荒醉生無益於人死無聞於後是自棄也嘗造船其木屑竹頭皆令籍而掌之人都不解所以會積雪初晴廳事前猶濕乃以木屑布地及桓溫伐蜀乏鐵以所拾竹頭作釘裝船其綜理微密皆此類也咸和三年蘇峻舉兵

犯闕江州督溫嶠推侃爲盟主同赴國難侃與溫嶠會於石頭部將彭世斬峻於陣復斬其弟逸於石頭進長沙郡公加都督交廣等七州諸軍事移鎮巴陵四年溫嶠卒朝命以嶠軍司馬劉允爲江州刺史侃言允非方伯才且曰自江陵至建康三千餘里國之南藩要害之地允以汰侈卧而對之不有外變必有內患矣司徒王導不從五年右將軍郭默果襲殺劉允司徒導以默驍勇難制以爲江州刺史侃聞投袂起曰此必詐也卽將兵討之上表言狀且與導書曰默殺方州卽用爲方州害宰相亦用爲宰相乎導答書云默據上流之勢加以船艦成資故包含容忍以俟足下豈非遵養時晦以

定大事者耶侃笑曰是乃遵養時賊也兵至默將縛默以降
斬之詔侃都督江州領刺史移鎮武昌侃遣子斌與南中郎
將桓宣西伐樊城走石勒將郭敬使兄子臻竟陵太守李陽
等共破新野遂平襄陽加拜大將軍劍履上殿入朝不趨贊
拜不名侃深以盈滿自懼上表固讓疾篤又上表遜位以後
事付右司馬王愆期侃輿疾出臨津就船明日薨於樊溪年
七十六諡曰桓侃在軍四十餘年明毅善斷識察纖密人不
能欺自南陵今甯國府至於白帝今夔州府數千里中道不拾遺尚書
梅陶嘗曰陶公機神明鑑似魏武忠順勤勞似孔明陸抗諸
人不能及也謝安每言陶公雖用法而恒得法外意其爲世

所重如此崇祀鄉賢祠子男十有七人洪瞻夏旌斌利節
皆有封秩見舊史範最知名瞻另有傳劉稿注嘗志名志皆注侃鄱陽人徙家潯
陽謹按當云鄱陽郡人後改隸潯陽蓋鄱陽漢屬豫章郡孫
吳改屬鄱陽郡晉改屬潯陽郡侃表嘗自言臣父母舊葬今
在潯陽亦謂臣父母舊葬之地今屬潯陽郡也否則當云舊
葬潯陽不當云今在潯陽矣且觀鄱陽都昌皆首列陶公於
鄉賢祠祀而九江獨無尤大可見

宋

劉彥誠字彬國舊誤國彬才識明練長於方畧宋初徵爲都總管權

知興國軍勸農事以開國元勲賜諸侯王劍抵捍小戎捕獲
諸強寇奏十六件利宜便事越衆賜賞加易簡上散騎常侍

光祿大夫卒謚武忠

舊作忠武

勅葬黃金鄉崇祀忠義孝弟祠

劉錡字信叔仲武第九子幼隨父任寓居秦州成組以蔭補受三班借職容貌偉碩突涉經傳長由閤門祗候拜宣贊舍人出知岷州累立戰功官至龍神衛四廂都指揮使東京副留守金人圍順昌錡大敗之連奉勅旨班師旣而洪皓自金密奏順昌之捷北國膽落有捐燕以南之意而王師遽還爲可惜也逾月虜復犯許沙河來求救或言當請於朝錡曰請將不及卽提師星馳之虜解去紹興十一年金人圍壽春入廬州錡擊之兀朮望見錡隊驚曰此順昌旂幟也不戰而卻遂復廬州張俊以私憾誣錡功罷知荆南安撫使六更寒暑老奸屏帖訟無畱延楚人神明之三十一一年召爲江淮浙西制

置使帥師屯揚州九月完顏亮南下錡遣兵復泗州加太尉
威武軍節度使十月金人自渦口渡淮錡帥師次淮陰使善
沒者沈其舟隨機曉夕處畫憂積熏心爲之嘔血詔還鎮江
以萬壽觀使奉朝請宜醫賜藥無虛日明年閏月卒贈開府
儀同三司封彭城郡公諡武穆

曹彥約字簡甫號昌谷興宗次子朱子守南康嘗受業焉由淳
熙進士爲建平尉桂陽司錄厯辰溪樂平令薛叔似宣撫京
湖辟主管機宜文字檄攝漢陽軍事時郡兵寡弱彥約搜訪
土豪得許尚俾總民兵趙觀使防水道黨仲昇將宣撫司軍
屯郡城以備金金重兵圍安陸遊騎闖漢州彥約授觀方畧

結漁戶拒守南河觀逆擊殲其前鋒又遣仲昇劫金人砦殺傷甚衆以守禦功進秩二等就知漢陽嘉定元年詔求直言彥約上疏言不宜恃和弛備隨提舉湖北常平權知鄂州時大盜羅世傳李元礪李新等相繼竊發桂陽茶陵等縣皆被殘破彥約料理戰守之備人心始定遷直秘閣知潭州湖南安撫時有欲招安李元礪者朝命下湖南議招討之宜彥約言招安非計乃督諸將逼巢而屯擊斬李新遂復桂陽隨購世傳使誅元礪世傳桀驁要挾彥約又購其黨羅九舊志作久千誅之賊黨盡平權戶部侍郎時沔陽都統制王大才驕橫制置使董居誼反曲意奉之彥約憤疏陳其弊不能用出爲利